

## Jon-ate kaapiya nyendoos

### *Vakasin metumin-ate*

<sup>1</sup> + o 1:1 Jon 1:1-2,4; 1Jon 2:13-14\*Hey naanêel vu ham naambe omaaho vakasin metumin-ate ond yoo nando munggin in va pin, tombe hey hango osin hey aahe lak hey amekaalus, yik hey aahe keen osin hey namangg lôôh. <sup>2</sup> + o 1:2 Jon 1:14\*Metumin-anju tok laam langaah atombe hey aahe, ondeey hey natulin osin hey naanêel langaah vu ham nambe metumin danggata-têênju nando having Mangganaan, le tok laam langaah vu hey. <sup>3</sup> De va sen hey naahe osin hey nangoyinato, ond hey natulin vu ham having in nambe ham alompayo javuh ti gaving hey, tombe yiy pin yalonggpayo javuh ti gaving Aamangg ayuuh Noow Yesu Kalisi. <sup>4</sup> + o 1:4 Jon 16:24\*Vakasin-anjo hey kaavu vu ham in nambe yahengg anivasa lôôt.

### *Anutu ond melangaah danggakook*

<sup>5</sup> + o 1:5 1Ti 6:16; Jem 1:17\*In banye sen hey hango vu Anutu Noow-ambe hey naanêel langaah vu ham-ato, ond nambe Anutu melangaah danggakook, de mekanu daka me-neep vu yi le, malis lôôt. <sup>6</sup> + o 1:6 1; Jon 2:4; Jon 3:21\*Om yiy naanêel naambe yiy ahondoos Anutu be yalonggpayo lavuh ti, lemu yiy nala mop amekanu, ond yiy navu tatuhin-ambe yame naawiing va lohvu vakasin keen-ato le. <sup>7</sup> + o 1:7 Ais 2:5; Hiblu 9:14; Taato 1:5; 7:14\*Nganjo naambe yiy

nando monaawiing va hôök melangaah, nambe sen Anutu nando hôök melangaah alopayô-to, ond mem yiy nando osin yalonggpayo lavuh ti, tonde Noow Yesu-te nihees navu kawiiy yate nipaya pin nala.

<sup>8</sup> + o 1:8-9 Saam 32:5; Pro 28:13\*Le yiy naanêel naambe yate nipaya ma, ond yiy navu tatuhin yiy, tombe vakasin keen-ame neep hôök yalonggpayo le. <sup>9</sup> Nganjo yiy naanêel yate nipaya langaah, ond Anutu omaaho nivalok om le biing gaving yite vakasin-ambe kawiiy yate va nipaya na, de jipis yaningook pin na vêel. <sup>10</sup> Yiy naanêel naambe yame aawiing va nipaya le, ond manyinjo yaanêel nambe Anutu omaaho tatuhin vaha, tonde yite vakasin-ame lokaale yalonggpayo le.

## 2

### *Kalisi nahôovu yiy*

<sup>1</sup> + o 2:1 Hiblu 7:25; 9:24\*Sa noongg-aso, sa navu kaavu vakasin-anjo vu ham in nambe ham-ame ambiing va nipaya le, lemu ti nambe biing va nipaya, ond yate omaaho sen kataangg Mangganaan in yiy-ato nando, ond yik omaaho nivalok Yesu Kalisi. <sup>2</sup> + o 2:2 1; Jon 4:10,14; Jon 1:29; 11:52; Kol 1:20\*In Yesu Kalisii-ju ond yate mop timu sen Anutu kawiiy yate va nipaya na, le me-yate nipaya

yoow e, nganjo hil pin-ate nipaya.

<sup>3</sup> Naambe yiy navu samu Anutu-te tanasin ond mem yalak ni vanuh nambe yalak Anutu ni keen. <sup>4</sup> + o 2:4 1; Jon 1:6,8\*Omaaho ti naanêel naambe, “Sa lak Anutu ni,” lemu me-navu samu

yite tanasin e, ond yi omaaho tatuhin ambu de vakasin keen-ame lokaale lopayo le. <sup>5</sup> + o 2:5 Jon 14:21,23; 1Jon 4:12,17; 5:3\*De ti sen navu samu Anutu-te vakasin-ato, ond yite lopayo doos having Anutu keenaanôôn. Nambêênju ond mem yalak ni keen nambe yalonggpayo lavuh ti having Anutu. <sup>6</sup> + o 2:6 Jon 13:15\*Omaaho ti nanêêl nambe “Sa longgpayo timu having Anutu,” ond omaaho tii-ju yoo sapa mop anivalok naambe Yesuu-to.

*Hil sen ahend having halindin-ato ond dando hôôk melangaah*

<sup>7</sup> + o 2:7 2Jon 5-6; 1Jon 2:24; 3:11\*Sate va-so, same navu kaavu tanasin moos ti vu

ham e, nganjo sa navu kaavu tanasin bôôy sen yoo neep vu munggin-ato, de tanasin bôôy-anjo ond vakasin sen ham hango lung laa-to. <sup>8</sup> + o 2:8 Jon 1:9; 13:34; Lom 13:12\*Lemu tanasin sen sa navu kaavu vu ham-anja ond yik tanasin moos, de Yesu navu taato nambe tanasin-anju keen, de ham navu taato having, in mekanu nalung nala de melangaah keen tum laam lung la.

<sup>9</sup> + o 2:9 1; Jon 3:10,15; 4:20\*Omaaho ti naanêêl naambe lokando melangaah alopayo, lemu nayi hali paya lôôt, ond naahen nando hôôk mekanu lôôt-ambe gêên. <sup>10</sup> + o 2:10 Lom 14:13; Jon 11:9\*Le naambe ti ahe naving hali, ond yoo nando hôôk melangaah alopayo, de va nipaya ti me-neep hôôk lopayo in nambe biing-ambe dupake le. <sup>11</sup> + o 2:11 Jon 11:10; 12:35\*Nganjo omaaho sen nayi hali paya lôôt-ato ond nando hôôk mekanu, tombe nala mop osin mekanu, om doosin mop sen

nalaa-to in taaku mekanu wiing-ambe mekaalus amekanu hôök lung la.

<sup>12</sup> + o 2:12 1Ko 6:11\*Sate unoopasiv-aso, sa kaavu laas vu ham in Anutu ka navu Yesu be kawiiy hamate va nipaya la vêêl. <sup>13</sup> + o 2:13 1; Jon 1:1; Jon 1:1\*Aamangg-aso, sa kaavu laas vu ham in ham alak omaaho sen yoo nando nyendoos-ato ni. Maanggêêm-aso, sa kaavu laas vu ham in ham laanggôôl omaaho nipaya Saalang lung la.

<sup>14</sup> Sate unoopasiv-aso, sa kaavu laas vu ham in ham alak Aamangg ani. Aamangg-aso, sa kaavu laas vu ham in ham alak omaaho sen yoo nando nyendoos-ato ni. De maanggêêm-aso, sa kaavu laas vu ham in nambe ham atu hil aniwêêk-ambe Anutu-te vakasin lukaneep ham alompayo, om ham laanggôôl omaaho nipaya Saalang lung la.

### *Yahengg-ame gaving va voon-ate le*

<sup>15</sup> + o 2:15 Lom 8:7; Jem 4:4\*Ham ahem-ame gaving va voon-ate le. Omaaho ti nambe ahe gaving va voon-ate ond ahe me-naving Aamangg e. <sup>16</sup> + o 2:16 Lom 13:14; Jem 4:16; 1Pi 2:11\*In va pin sen nando hôök va voon alopayôô-to, yik yalonggpayo nawiiing navu navu, osin menôôn, be yiyi hatee yiyi ak in yate va voon-ate, ond me-laam vu Aamangg e, nganjo yoo vu voon-anjo. <sup>17</sup> + o 2:17 1Ko 7:31; Mat 7:21\*Voon osin va voon-ate pin sen hil dawiiing mend nôôn in-ato ond nalung nala, nganjo omaaho sen yoo monawiiing va lohvu Anutu kaa-to ond nando in mando danggata.

### *Omaaho sen nyiis ngaamong vu Kalisii-to*

<sup>18</sup> + o 2:18 1Pi 4:7; Mat 24:5,24; 2Jon 7\*Unoopasiv-aso, yiy aalokalaam busin taamusin ahus-anjo. Ham hango bôôy nambe omaaho sen nyiis ngaamong vu Kalisii-to navu naam, ond géên hil sen dayiis ngaamong vu Kalisii-to ngeeyaata lalaam lung la, om yalak ni nambe busin ahus-ato manyinjo. <sup>19</sup> + o 2:19 Sin 20:30; 1Ko 11:19\*Hil-anju lavuuh yiy, lemu yame yate hil sil e. Nambe yate hil sil ond sil e mando gaving yiy, le ma de sil lavuuh yiy, ond taato nambe sil pin ond yame yate hil sil e.

<sup>20</sup> + o 2:20 1Ko 2:15; 1Jon 2:27\*Le ham ond Vavi Vaambuung lakala ham lung la be ham pin alak vakasin keen ani. <sup>21</sup> Me-nambe sen ham doosin vakasin keen ondeey sa kaavu kaapiyaa-jo laas vu ham e, nganjo soo kaavu in ham alak vakasin keen ani osin ham alak ni nambe vakasin tatuhin ti me-laam vu vakasin keen alopayo le.

<sup>22</sup> + o 2:22 1; Jon 4:3; 2Jon 7\*Om lati omaaho tatuhin vaha? Omaaho sen lak alu in Yesu nambe yi me-omaaho sen Anutu yoo holin yi vulôôt-ato le, ond yik omaaho sen lak alu in Anutu yuuh Noow-ato, ond manyinjo omaaho sen nayiis ngaamong vu Kalisii-to. <sup>23</sup> + o 2:23 Jon 5:23; 15:23; 1Jon 4:15; 5:1; 2Jon 9\*Hil pin sen lalak alund in Noow, ond Anutu me-nando having sil e, le ti nambe naanêel langaah naambe Yesu ond Anutu Noow yi, ond Mangganaan Anutu nando having yi.

<sup>24</sup> Vakasin sen ham hango nyendoos-ato ond ham naapuvu tatin. Naambe ham samu vakasin sen ham hango bôôy-ato niwêêk hôôk ham alom-payo, ond mem ham e mando dôôk maayuh

Mangganaan alondpayo. <sup>25</sup> + o 2:25 Jon 3:15; 6:40\*De jôôy vakasin vu yiy nambe le biing-ambe yiy mando metumin danggata.

<sup>26</sup> Vakasin-anjo sa kaavu vu ham lak hil sen lawiingin nambe tatuhin ham-ato. <sup>27</sup> + o 2:27 Jon 14:26; 16:13\*Lemu ham ond Kalisi wiing yite Vavi Vaambuung laas lakala ham-ambe nando, om omaaho ti me-naanêel tanasin vu ham gaving e, in

Vavi Vaambuung navu tatekin va pin vu ham, om Vavi Vaambuung-ate vakasin-anja mevakasin tatuhin e, nganjo vakasin keen. Om ham oo anggulis Kalisi baambu lôôt nohvu Vavi Vaambuung nêel vu ham-ato.

<sup>28</sup> + o 2:28 1; Jon 3:2; 4:17\*Unoopasiv-aso, gêên-anjo ham oo mando hôok Kalisi lopayo in nambe busin sen nom-ato ond yiy baale niwêek gaving yi, de yame yanning naamum vu yi le. <sup>29</sup> + o 2:29 1; Jon 3:7,10\*Ham alak ni nambe Anutu omaaho nivalok, ond ham anjak ni naambe hil pin sen sil dawiing va lohvu-to, ond Anutu wiing-ambe sil latu yite noondin.

### 3

#### *Anutu noow-aso yiy*

<sup>1</sup> + o 3:1 Jon 1:12-13; 16:3\*Ham akam bu le, Anutu nêel nambe yite noow-aso yiy ond taato nambe ahe yoo having yiy bopaata lôôt, om yite noow-aso yiy keen ondeey hil voon doosin yiy, in dangga nambe sil doosin Anutu.

<sup>2</sup> + o 3:2 2Ko 3:18; Pil 3:21\*Sate va-so, gêên yaatu Anutu-te unoopasiv, de vu taamusin yale mando

naambe va? Vaa-ju me-need langaah e, om yiy doosin, lemu yalak ni nambe Kalisi naatok nom atombe yale naatu naambe yi, in yale aangge yi keen. <sup>3</sup> Tonde hil pin sen kand navu vaa-jo be danggin busin-anjuuto, ond sil oo davu samu sil alondpayo nivasalôôt lohvu sen Kalisi yoo nando nivasalôôt-ato.

<sup>4</sup> Hil pin sen dawiiing va nipayaa-to ond davu kalêêh Anutu-te tanasin, in va nipaya ond manyinjo vakasin kalêêsin. <sup>5</sup> + o 3:5 2Ko 5:21; 1Pi 2:22-24; 1Jon 2:2\*Ham alak ni nambe Kalisi laam in nambe kawiiy va nipaya na, in va nipaya ti me-need hôok Kalisi lopayo le. <sup>6</sup> + o 3:6 Lom 6:1-2,14\*Hil pin sen yoo dando hôok Kalisi lopayôoto ond me-dawiiing va nipaya le, tonde hil pin sen dawiiing va nipayaa-to ond sil-ame lalak Kalisi ni keen e, nganjo sil doosin.

<sup>7</sup> + o 3:7 1Jon 2:29\*Unoopasiv-aso, ham-ame ambiing gaving hil-ate vakasin tatuhin e. Hil sen mondawiiing va nivasaa-to ond sil hil anivalok nambe sen Kalisi omaaho nivalok-ato. <sup>8</sup> + o 3:8 Jon 8:44\*De hil sen mondawiiing va nipayaa-to ond silate danggakook neep vu Saalang. In Saalang ond yoo monawiiing va nipaya vu bôôy nyendoos lôôt-ambe nandôô-jo, lemu Anutu Noow ond laam in nambe kawiiy Saalang-ate kul na valok-ate. <sup>9</sup> + o 3:9 1; Jon 5:18\*Hil sen latu Anutu-te noondin-ato ond me-dawiiing va nipaya le, in Anutu-te nôôn metumin nando hôok sil, om sil-ame lalohvu nambe lambiiing va nipaya le, in sil latu Anutu-te noondin lung laa-to. <sup>10</sup> Vaa-jo navu taato Anutu-te unoopasiv-aso de Saalang-ate unoopasiv-aso, in hil sen me-dawiiing

va nivalok-ato de ahend-ame naving halindin e, ond Anutu me-yite unoopasiv-aso sil e.

### *Ham ahem oo gaving ham*

<sup>11</sup> + o 3:11 Jon 13:34\*Vakasin sen ham oo hango vu bôôy nyendoos-ato ond nambe yahengg oo gaving yiy. <sup>12</sup> + o 3:12 Jen 4:8\*De yame naambe Adam noow Kain e, in Kain ond Saalang-ate unoopasiv ti tombe yis hali be yimb. De yis halii-ju in dangga nambe vaati? Yik yis in dangga nambe yoo monawiing va nipaya de hali monawiing va nivasa.

<sup>13</sup> + o 3:13 Mat 5:11-12; Jon 15:18-19\*Halingg-aso, naambe hil voon lanji ham paya lôôt ond ham-ame kam yu-yuuh e. <sup>14</sup> + o 3:14 Jon 5:24; 1Jon 2:11\*Yahengg naving Omaaho Bop-ate hil om yalak ni nambe yiy havuuh mop yimbin-ate lung la, de yiy naaloh mopaatôôv metumin-ate. De omaaho sen ahe me-naving hil-ato le ond naahen naloh mopaatôôv yimbin-ate. <sup>15</sup> + o 3:15 Mat 5:21-22; Taato 21:8\*Omaaho sen yoo nayi hali paya lôôt-ato ond lohvu omaaho sen yis omaaho ango be yimb-ato. Tonde ham oo alak ni nambe omaaho sen yis omaaho ango be yimb-ato, ond me-naloh mop sen na mando metumin danggata-têto le, malis. <sup>16</sup> + o 3:16 Jon 13:1; Gal 1:4; 1Tes 2:8\*Om nambêênja yalak ahe havingin danggakook ani nambe Kalisi yoo vu yi la doos-ambe yimb in dôôvu yiy, om yik yiy oo aambu yiy na doos in dôôvu yiy halingg-aso ond mem nivasa. <sup>17</sup> + o 3:17 Diu 15:7\*Le naambe omaaho ti-te va voon-ate nando, le yi nambe hali nativak in



vati, lemu lopayo niwêêk-ambe me-hôôvu le, ond ahe me-having Anutu le, malis lôôt.

<sup>18</sup> + o 3:18 Jem 2:15-16\*Unoopasiv-aso, ahe havingin-ame nanjip ak yavingg osin yiy dalaangg malis amu le, nganjo yaambiing nôôn jak osin yahengg gaving keenaanôôn.

*Yalonggpayo niwêêk-ambe yiy baale Anutu me*

<sup>19</sup> Yahengg gaving naambêênjo ond mem yanjak ni naambe Anutu sen vakasin keen danggakook-ato noow-aso yiy, tombe mem yalonggpayo gato javuh-ambe yiy baale niwêêk hôôk Anutu me. <sup>20</sup> Le naambe yalonggpayo nayiis yiy laah in nambe yaawiing va nipaya bôôy-ambe neep hôôk yalonggpayo om mak Anutu le bu dôôk nyevahaan vu yiy, ond yalonggpayo gato javuh yi naah, in Anutu bopaata savok yalonggpayo la be lak va pin ani.

<sup>21</sup> + o 3:21 Hiblu 4:16\*Sate va-so, naambe yalonggpayo me-nyis yiy in nambe Anutu me-le bu dôôk yate nipaya nyevahaan e, ond mem yiy naale niwêêk hôôk Anutu me, de yame naayêênin e. <sup>22</sup> + o 3:22 Mat 21:22\*De va pin sen yiy navu kataangg vu Anutuu-to ond navu vu yiy, in yiy navu samu yite tanasin-ambe yiy naawiing va sen nayi nivasaa-to. <sup>23</sup> + o 3:23 Jon 6:29; 13:34\*Tonde yite tanasin ond nambêênjo nambe yaambiing gaving Yesu Kalisi naambe Anutu Noow yi, osin

yahengg gaving yiy nohvu tanasin sen Yesu yoo nêêl vu yiy-ato. <sup>24</sup> + o 3:24 Lom 8:9; 1Jon 4:13\*Omaaho sen navu samu Anutu-te tanasin-ato ond yoo nando hôôk Anutu lopayo, tonde

Anutu nando hôôk lopayo, de wiing yite Vavi Vaambuung laam vu yiy om yalak ni nambe Anutu nando hôôk yalonggpayo.

## 4

### *Vavi Vaambuung-ande tatuhin vaha-so*

<sup>1</sup> + o 4:1 Mat 7:15; 1Jon 2:18; 2Jon 7; 1Tes 5:21\*Sate va-so, hil sen danêêl nambe Vavi Vaambuung nando having sil-ambe sil danêêl tanasinato ond ham-ame ambiing gaving sil pin e. Nganjo ham oo sahi vêêl e naambe Anutu-te Vavi Vaambuung keen nando having sil me malis, in hil tanasin tatuhin vaha-so ngeeyaata lala dando lohvu taaku pin. <sup>2</sup> + o 4:2 1Ko 12:3\*De Anutu-te Vavi Vaambuung ond ham e anjak ni lak vakasin-anjo naambe hil pin sen danêêl langaah nambe Yesu Kalisi tu omaahonôn keen, ond hil-anjo Anutu wiing Vavi Vaambuung la nando having sil. <sup>3</sup> + o 4:3 2; Jon 7; 1Jon 2:18\*Nganjo hil pin sen danêêl nambe Yesu me-tu omaahonôn keen e, ond Anutu me-wiing Vavi Vaambuung la nando having sil e, malis. Yik ka tatuhin-anju laam vu omaaho sen nayiis ngaamong vu Kalisii-to, in bôôy yiy hango nambe ka tatuhin-anju le naam, om gêên tok laam lung la.

<sup>4</sup> + o 4:4 1; Jon 5:4-5; Mat 12:29\*Unoopasiv-aso, Anutu-te noow-aso ham, om ham ayiis ngaamong vu hil tanasin vaha tatuhin-aso be ham laanggôol sil, in omaaho sen lukando ham alompayôô-ja ond niwêêk kaluuh omaaho sen lukando hil voon alondpayôô-to. <sup>5</sup> + o 4:5 Jon 15:19\*Hil-anju sil vu voon-ate, om yoo lanêêl vakasin voon-ate be hil vu voon langoyin sil lavand. <sup>6</sup> + o 4:6 Jon

8:47\*De yiyi vu Anutu-te, om omaahonôn sen lalak Anutu ni ond sil dambe nanyend in yate vakasin, nganjo hil sen Anutu me-yite hil sil e, ond sil-ame dangoyin yiyi lavangg e. Ke, lak dangga nambêênjo ond yale anjak vakasin ani naambe laam vu Vavi Vaambuung vakasin keen-ate, tonde yik yale anjak vakasin vaalu ni naambe laam vu tatuhin

vaha-so.

### *Ahe havingin danggakook Anutu*

<sup>7</sup> + o 4:7 1Jon 2:29\*Sate va-so, yahengg gaving yiyi, in ahe havingin-anjo ond yoo danggakook vu Anutu, om hil sen ahend naving-ato ond Anutu wiing-ambe sil latu yite noow-aso, tombe sil lalak Anutu ni keen. <sup>8</sup> + o 4:8 1Jon 4:16\*Omaaho ti ahe me-naving hil e ond me-lak Anutu ni le, in ahe havingin ond yoo danggakook Anutu. <sup>9</sup> + o 4:9 Jon 3:16\*De Anutu wiing Noow nôn timu Yesu lokalaam voon in nambe biing-ambe yiyi mando metumin, ond manyinjo taato nambe Anutu ahe having yiyi keen. <sup>10</sup> + o 4:10 Lom 5:8-10; 1Jon 2:2\*Yik ahe havingin danggakook nambêênjo, de me-nambe yahengg having Anutu le, nganjo Anutu yoo ahe having yiyi-ambe wiing Noow Yesu laam voon-ambe tu yate mop sen Anutu kawiiy yate va nipaya naa-to.

<sup>11</sup> + o 4:11 Mat 18:33\*Sate va-so, Anutu ahe having yiyi keen lôôt nambêênju, om yahengg oo gaving yiyi halingg-aso keen ond mem. <sup>12</sup> + o 4:12 Jon 1:18; 1Jon 2:5-6\*Omaaho ti me-yi me lak Anutu le, lemu yahengg gaving halingg-aso ond

Anutu nando having yiyi, tombe mem yite ahe havingin neep hôök yalonggpayo keen lôôt.

<sup>13</sup> + o 4:13 2Ko 1:22; 1Jon 3:24\*De wiing yite Vavi Vaambuung laam vu yiyi, om yalak ni nambe Anutu nando hôök yalonggpayo de yiyi nando hôök Anutu lopayo. <sup>14</sup> + o 4:14 Jon 3:17\*Hey aahe lak hey amengg ondeey hey naanêel langaah nambe Aamangg wiing Noow laam voon in nambe nôôh omaahonôôn pin vêel. <sup>15</sup> + o 4:15 1Jon 5:5\*Omaaho ti nambe naanêel Yesu langaah naambe Anutu Noow ond Anutu nando hôök lopayo, de yoo nando hôök Anutu lopayo. <sup>16</sup> + o 4:16 1Jon 4:8\*De yalak ni osin yaawii-having nambe Anutu ahe having yiyi keen.

Ahe havingin ond danggakook Anutu, om naambe omaaho ti nando hôök ahe havingin alopayo ond yoo nando hôök Anutu lopayo, de Anutu nando hôök lopayo. <sup>17</sup> + o 4:17 1Jon 2:28\*Tonde yate ahe havingin natu bopaata nalak lôôt, in nambe busin sen Anutu sahi hil pin-ate vakasin-ato ond yame aanjêênin e, yiyi oo baale niwêêk, in yiyi nando voon-anjo ond yik lohvu Kalisi nandôô-to. <sup>18</sup> Niyenin-ame neep hôök ahe havingin alopayo le, nganjo ahe havingin keenaanôôn neep ond mem natiiy niyenin nala. Niyenin-anjo dangga nambe gale naatovu nipaya nyevahaan. Omaaho ti niyenin neep vu yi ond ahe havingin-ame neep vu yi niwêêk lôôt e.

<sup>19</sup> Ahe havingin neep vu yiyi-anjo in Anutu yoo ahe having yiyi munggin. <sup>20</sup> De omaaho ti naanêel naambe, "Sahengg having Anutu," lemu yoo nayi hali paya lôôt, ond omaaho tatuhin ambu, in nayi

hali lemu ahe me-naving e, om ahe le gaving Anutu sen me-yi me lak-ato naambe va? Malis. <sup>21</sup> + o 4:21 Mat 5:44-45; Mak 12:29-31\*In tanasin-anjo ond Kalisi nêel vu yiyi nambe omaaho ti ahe gaving Anutu ond yoo ahe gaving halindin-aso gaving.

## 5

*Yaambiing gaving niwêêk ond le daanggôôl va voon-ate*

<sup>1</sup> + o 5:1 1; Jon 4:15\*Hil pin sen dawii-having nambe Yesuu-ju yi omaaho sen Anutu yoo holin yi vulôôt-ato, ond sil latu Anutu noondin, tonde hil pin sen ahend naving omaaho ti ond ahend naving omaahôô-ju noow having. <sup>2</sup> Naambe yahengg naving Anutu be yiyi navu samu yite tanasin, ond mem yalak ni nambe yahengg naving Anutu-te unoopasiv-aso. <sup>3</sup> + o 5:3 Jon 14:15,23-24; 2Jon 6; Mat 11:30\*In yahengg naving Anutu ond dangga nambe yiyi navu samu yite tanasin, tombe yame le aangge naambe yite tanasin animeen e. <sup>4</sup> + o 5:4 Jon 16:33\*In hil pin sen Anutu wiing-ambe latu yite noondin-ato ond daanggôôl va voon-ate, tonde va niwêêk sen naanggôôl va nipaya voon-atêeto ond yik yalonggpayo la timu vu Anutu. <sup>5</sup> + o 5:5 Lom 8:37; 1Jon 4:4\*Tonde omaaho lati naanggôôl va voon-ate? Yik omaaho sen wii-having Yesu nambe Anutu Noow yii-to.

*Va yaalapim taato Yesu Kalisi langaah*

<sup>6</sup> + o 5:6 Jon 1:29-34; 1Jon 1:7\*Yesu Kalisii-ju laam-ambe lipis bel osin kaasêeh yite nihees la. De me-laam-ambe lipis bel amu le, nganjo lipis

bel osin kaasêêh nihees, tonde Vavi Vaambuung nanêêl yi langaah having, in Vavi Vaambuung ond vakasin keen danggakook. <sup>7</sup> + o 5:7 Jon 15:26\*Om va yaal-anjo nanêêl Yesu langaah,

<sup>8</sup> yik Vavi Vaambuung-ande bel osin nihees. Va yaal-anjo ond yik yaal ahondoos-ate vakasin neep ti. <sup>9</sup> + o 5:9 Jon 5:32-37; 8:18\*Yiyy

nango vakasin sen omaahonôôn danêêl langaah-ato, lemu vakasin sen Anutu nanêêl langaah-ato ond savok omaahonôôn-ate la, de vakasin sen Anutu nanêêl langaah-ato ond nanêêl lak Noow Yesu. <sup>10</sup> + o 5:10 Gal 4:6\*Hil pin sen londpayo nala timu vu Anutu Noow-ato, ond lalak ni vanuh nambe Yesu ond yi Anutu Noow keen. Lemu omaaho sen me-wii-having Anutu le, ond lohvu nêêl nambe Anutu navu tatuhin, in dangga nambe me-wii-having vakasin sen Anutu nêêl langaah lak Noow-ato le. <sup>11</sup> Om vakasin keen sen Anutu nêêl langaah-ato nambe Anutu vu metumin danggata-te vu yiy lung la, metumin-anjo dangga lak Noow Yesu timu. <sup>12</sup> + o 5:12 Jon 3:36\*Hil pin sen Anutu Noow nando having sil-ato ond sil dala mop metumin-ate, de hil pin sen Anutu Noow-ame nando having sil-ato, ond me-dala mop metumin-ate le.

### *Yiy mando metumin danggata-te*

<sup>13</sup> + o 5:13 Jon 20:31\*Sa kaavu vakasin-anjo laas vu ham in nambe ham anjak ni vanuh naambe ham sen ham alompayo nala timu vu Anutu Noow-ato, ond metumin danggata-te tu hamate va. <sup>14</sup> + o 5:14 Jon 14:13; 16:23; 1Jon 3:21-22\*Om yiy naale niwêêk hôôk Anutu me de yame

naayêênin e, in yiyi kataangg vati nohvu Anutu ka ond nango yate vakasin. <sup>15</sup> Om sen yalak ni nambe yiyi kataangg va ond nango yate vakasin, ond yik yalak ni having nambe va sen yiyi navu kataangg-ato ond yiyi hako lung la.

<sup>16</sup> + o 5:16 Mat 12:31\*Omaaho ti ji naambe hali nawiing va nipaya, le va nipayaa-ju me-lohvu nambe biing-ambe omaahôô-ju na menama valok-ate le, ond hali sen yii-to yoo kataangg Anutu tombe Anutu bu metumin vu yi. Manyinjo sa naanêêl lak hil sen silate nipaya me-lohvu nambe biing-ambe lana mend nama valok-ate le. De nipaya sen

biing-ambe omaahonôôn lana mend nama valok-atêêto ond hil dawiiing, lemu same naanêêl nambe ham kataangg Anutu in vaa-ju le. <sup>17</sup> Va pin sen hil dawiiing-ambe me-nivalok-ato, ond manyinja nipaya, lemu va nipayaa-ju vaalu ond me-lohvu nambe biing-ambe hil lana mend nama valok-ate le.

<sup>18</sup> + o 5:18 1; Jon 3:9; Jon 17:15\*Yalak ni nambe hil pin sen Anutu wiing-ambe sil latu yite noondin-ato ond me-dawiiing va nipaya le, in Anutu Noow oo nanggin sil anivasa om Omaaho Nipaya nama me-nalak sil e.

<sup>19</sup> + o 5:19 1; Jon 4:6\*Yalak ni nambe yiyi aatu Anutu noow-aso, de va voon-ate pin oo neep hôôk Omaaho Nipaya nama. <sup>20</sup> + o 5:20 Jon 17:3\*Tonde yalak ni nambe Anutu Noow laam lung la tombe vêêl yalungg ak-ambe yiyi nalak Anutu keen ani. Tombe yiyi nando hôôk Anutu keen-anju lopayo in dangga nambe yaatu Noow Yesu Kalisi-te hil lung laa-to. Tonde Yesuu-ju

ond Anutu keenaanôôn osin metumin danggata-  
te danggakook yi.

<sup>21</sup> + o 5:21 1Ko 10:14\*Om noongg-aso, ham  
oo ganggin ham in anutu tatuhin vaha-so. Yik  
vakasin lung laa-ja.



**Mangga Buang New Testament**  
**The New Testament in the Buang, Mangga Language of**  
**Papua New Guinea**  
**Nupela Testamen long tokples Mangga Buang long**  
**Niugini**

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 3 Mar 2023 from source files dated 9 Oct 2020

8d739032-2a4b-567d-abd1-cb7e24ed2cd6